

四庫全書

子部

欽定四庫全書

子部
太白陰經卷八

詳校官中書臣閔思毅

編修臣倉聖脈覆勘

總校官知縣臣繆琪

校對官編修臣錢樾

謄錄監生臣管世勳

欽定四庫全書

太白陰經卷七

唐 李筌 撰

祭文書樂方總序

經曰古者天子望於山川徧於羣神諸侯祭其封內其觸石吐雲之山川神祇皆祭并所過名山大川福及生人神祇爾雅云既類既禡師祭也既伯既禱馬祭也師初出則禡軍之牙門禱馬羣廐蚩尤氏造五兵制旗鼓

師出亦祭之其名山大川風伯雨師並所過則祭不過則無妄祠毗沙門神本西方法佛說四天王則北方天王也於于闐城有廟身披甲右手持戟左手擎化塔祇從羣諸殊形異狀胡人事之往年吐蕃圍于闐吐蕃人夜見金人披髮持戟行于城上吐蕃衆數千萬盡患瘡疾莫能勝又化黑鼠咬弓弦無不斷絕吐蕃扶病而遁國家知其神乃於邊方立廟元帥亦圖其形旗上號曰神旗出居旗節之前故軍出而祭之至今州縣府多立

天王廟也一云昔吐蕃圍安西北庭表奏之救唐玄宗
曰安西去京一萬二千里八月方到到則無所及矣左
右請召不空三藏今請毗沙門天王師至請帝執香爐
師誦真言帝忽見甲士前立帝問不空不空曰天王差
二子獨捷領兵救安西來辭陛下後安西奏云城東北
三十里雲霧中見兵人各長一丈約五六里至酉時鳴
鼓角震三百里停二日康居等五國抽兵彼營中有金
鼠咬弓弦弩器械並損須臾北樓天王現身

禡牙文篇第七十三

維某載歲次某甲某月朔某日某將軍某敢以牲牢之
奠告於牙軍之神在昔三皇無師五帝有師所以伐奸
凶禦桀鰲定亂存良長蛇流毒寇掠我生聚殘害我邊
陲我君恥不祥之器以伐謀為兵愛不戰而屈人借前
箸為策遂得東夷貢矢西旅獻獒海澄河宴亦有年矣
今負固不庭起蜥遠山桀犬吠堯梟獍狼顧天子授我
斧鉞錫我彤弓鑿門分閭使專征伐恭惟乃神翼茲貔

武左霹靂右雷公天乙在前太乙在後風電雨霰尅勝
羣醜抱鼓未揮元克授首惟爾神靈來歆旨酒

馮馬文篇第七十四

維某載歲次某甲某月朔某日某將軍某謹以清酌少
牢之奠祭爾羣牧馬之神靈古者庖犧氏作服牛乘馬
引重致遠以代人勞爾能節齊和鑿舉鼙鼓陷矢石殪
奔禽聲嘶而長風始至影滅而浮雲猶見穆滿八駿足
跡接於瑤池王良駟馬人事標於天漢國家恩覃無垠

光宅有土皇化潛謚凡在蠻邦航海梯山貢金納帛而
猶豺狼難厭返首逆鱗學三苗之不共慕九黎之亂德
叛而不討何以示戒天子齋壇場拜飛將軍身衛彫戈
手執金鼓揮陣雲以出塞乘明月而渡河誓將揮種埋
落禽魑摘魁火烈具舉勢踰飄風惟爾馬神使我馬肥
風馳電轉龍驟魚奔晶甲霜明草木皆偃飛矢星落江
河斡旋一舉成功投我脫甲示不復用休爾于華山之
陽而已矣

祭蚩尤文篇第七十五

維某載歲次某甲某月朔某日某將軍某謹以牲牢之
奠祭爾炎帝之後蚩尤之神太古之初人尚敦素拓石
為內弦木為弧今乃鑠金為兵割革為甲樹旗幟建鼓
鞶為戈矛為戟楯聖人奄有寰海四征不庭服強畏威
伐叛誅暴擊五兵之利為萬國之資皇帝子育羣生義
征不惠蠢爾兇狡蟻鬪要荒今六軍戒嚴躬行天罰人
之不誅景福來臻使鼉鼓增氣熊旌佐威邑無堅城野

罕橫陣如飛霜而捲木拔山而壓卵火烈風掃戎夏大同允我一人之德由爾五兵之功而已

祭名山大川文篇第七十六

名山文

維某載歲次某甲某月朔某日某將軍某謹以清酌少牢之奠敬祭於某山之神惟神聰明正直惡盈福謙亭育黎甿作鎮方土國家天覆地載罔不宅心航海梯山回首內向獨彼兇醜毒害性成滔天虐人窺邊猾夏天

階其禍養成其克皇帝取亂侮亡兼弱攻昧赫斯怒奮
電霆雲湧雷轟風卷電掣今則萬騎雲會八陣戎裝頓
軍峰巒樵蘇林麓天道助順人情好謙天人共棄神鑒
孔明何不蒸雲鬱霧飛沙轉石助我軍威全師克獲牲
牢匪馨明德惟馨

大川文

維某載歲次某甲某月朔某日某將軍某謹以少牢敬
祭于某川之神惟神植德靈長善利萬物其柔也沉

鴻毛纖芥其剛也轉巨石截橫山興波鼓浪隔越華夷
避高就下兵形法焉我君胄有萬國道涵四海伐叛懷
遠右文講武是以扶餘肅慎左衽中庭夜郎滇池辮髮
役事惟彼兇虜敢干天常負固憑山搖蜂蠆之毒乘危
恃險運螳螂之斧天子授某等之兵士卒與我一心聞
鼓有死難之志神居五行之長百瀆之源藏蛟躍龍蒸
雲致雨今大軍利涉全師既行惟爾有神尚其吐天吳
驅風伯逐鯨魚使波皆連漪厲有淺清成軍將之事贊

天子之威

祭風伯雨師文篇第七十七

風伯文

維某載歲次某甲某月朔某日某將軍某謹以磔犬清酌祭于風伯之神惟神道出地戶跡遍天涯東溫而層水澌散西烈則百卉摧殘鼓怒而走石飛沙翻江倒海安靜則雲屯浪息綻柳開花暢百物以敷蘇使八方而寧謚達庶人之理暢大王之雄國家至道深仁豚魚服

信杜絕左袵混一車書海宴河清遠安邇肅惟彼兕孽
尚敢憑陵統烏合之衆恃蜂屯之徒險憑蟻壤浮遊朝
菌干我天誅非加懲艾何以廓清皇帝道惡殺生鞠
養羣品乃威以斧鉞懷以惠和先茅屆途後殿臨境兩
軍相見八陣將施惟爾明神號吼颼颼折木偃草使旗
旄指敵驚沙走石飛太山之行晝不見于虜目震雷霆
之嚮近不聽于虜耳蒙袂僵仆欵我轅門兵不血刃而
革戎同風而已

雨師文

維某載歲次某甲某月朔某日某將軍某謹以牲牢之
奠致祭于雨師之神惟神薄陰陽而成氣馭風雲而施
德威合風雷則禾木盡偃恩覃霧露而卉物敷榮昆陽
惡盈蕩新室之衆龜茲順助洗濟涼之師其實善也如
此則罰惡也如彼國家大業廣被休德洽如懷生之倫
盡荷明德蠢茲奸宄草竊遐荒使謀臣不暇高枕戰士
脫甲天子怒目按劍發驍勇誅不道天下士衆雲集星

馳氣騰青霄精貫白日熏狡兔穴覆梟鳥巢惟神何不
傾湫倒海以助天威蕩寇清讐以張軍勢按劍則日中
見斗揮戈而曜靈再晡壯戎軍之氣乃爾神之功

祭毗沙門天王文第七十八

維某載歲次某甲某月朔某日某將軍某謹稽首以明香
淨水楊枝油燈乳粥酥蜜粽餌供養北方大聖毗沙天
王之神伏惟作鎮北方護念萬物蕃衆悖逆肆以誅夷如
來涅槃委之僧法是以寶塔在手金介被身威凜商秋

德融湛露五部鬼神八方妖精殊形異狀襟帶毛羽或
三面而六手或一面而四目瞳顏如藍磔髮似火牙嵯
岬而出口爪鈎兇而露骨視雷霆喘雲雨吸風颭噴霜
電其叱咤也豁大海拔須眉摧風輪粉鉄圍並隨指呼
咸類驅策國家皈依釋教護法肇魔萬國歸心十方面
向惟彼黠虜尚敢昏迷肉食邊毗漁獵亭障天子出師
問罪要荒天王宜發大悲之心軫護念之力助我甲兵
戮彼克孽使刁斗不驚太白無芒雖事捷邊將而功歸

於天王哉

捷書露布篇第七十九

某道節度使牒上中書門下破逆賊某乙下兵馬使告捷事得都知兵馬使某牒稱今月某日某時於某山川探見賊與戰俘斬略盡今乘勝逐北未暇點算殺獲生級器械牛馬續即申上者天威遠播狂寇敗亡將盡煙塵同增慶抃謹差某乙馳驛告捷具狀牒上中書門下謹牒某年某月某日官某牒判官某官某行軍司馬某

使某官某道節度使奏破某賊露布事拔逆賊某城若干所生擒首領某人若干斬大將若干級斬首若干級獲賊馬若干匹甲若干領旗若干面弓弩若干張箭若干隻槍牌若干面衣裳若干事件應有得者具言之中書門下尚書兵部某道節度使某官臣某言臣聞黃帝興涿鹿之師大舜有三苗之役雖道高於千古猶不免于四征我國家德過唐虞功格區宇蠢斯狂寇昏迷不恭犬羊成羣犯我亭障臣今令都知兵馬使某官

某都統馬步若干人為虞候某官某領強弩若干人為
奇兵設伏虞候總管某官某領陌刀若干人為後節度
副使某官某領蕃漢子弟若干人為中軍遊騎以某月
日時于某山川與賊大軍相值埃塵漲空旌旗蔽野臣
令都知兵馬使官某大將軍當其衝左右虞候兩為翼
勢欲戰酣伏兵竊發賊眾懼駭虞候某陌刀掩至白刃
霜飛紅血星流從寅至午經若干陣所有殺獲具件如
前人功何能天力是贊謹差先鋒將某官某奉露布以

聞特望宣布中外用光史冊臣某頓首謹言某年月日
掌書記某官某上

治人藥方篇第八十

經曰藥者和草木之性治人寒溫燥濕之病道達經脈
通理三關九候五臟六腑扶衰補虛人氣鬱蒸其病或
瘧瘧疾痢金瘡墜馬所以隨軍備急

療時行熱病方

梔子 二十枚
乾姜 五兩
茵陳 三兩
升麻 三兩
大黃 五兩

芒硝

五兩

右六味為末飯汁飲調服空心三錢匕須臾利不利則暖粥投之利多則漿水飯止之愈陰陽毒不可服
療赤班子瘡

梔子

二十枚

柴胡

三兩

黃芩

三兩

芒硝

五兩

右為細末飯飲調下三錢匕以利為愈

療天行疫方

瓜蒌

四十粒

丁香

四十粒

赤小豆

四十粒

右為末并花水空心調服方寸匕次兩鼻中各搗此散一大豆許須臾鼻出黃水吐利良久乃愈

療瘡疾方

鱉甲 三兩 生常山 二兩 甘草 二兩 松羅 二兩

右為末用烏梅煎湯調服方寸匕日二服少加以吐為愈如未瘡者服當歸六味散

桂心 三兩 當歸 白朮 細辛 已上各五兩 大黃 五兩

朴硝 八兩 熬

右為末平旦空心服方寸匕加之得利為度

療瘧瘡者可服鬼箭十味丸方

甘草 丁香 細辛 蜀椒 烏梅肉

各三兩

地骨皮

橘皮

各四兩

白朮

當歸

各五兩

鬼箭

二兩

右為細末煉蜜為丸如梧桐子大每服十五丸烏梅湯送下再服加至三十九三五日後覺腹中熱以粥

飲壓之

療痢病方

黃連

黃苓

各五兩

黃芪

黃栢

各四兩

龍骨

八兩

右五味為散空心粥飲調方寸匕日再加三寸匕止

療穀痢方

白朮

六兩

附子

四枚炮去皮

乾姜

四兩炮

細辛

五兩

油麵末

一升熬變色

右為末以粥飲如前法

療血痢方

阿膠

炒

黃栢

各四兩

乾姜

艾葉

各三兩

犀角末

五兩

右為末如前法服

療膿血痢方

黃芪

六兩

赤石脂

八兩

艾葉

三兩

厚朴

炙三兩

乾姜

煨四兩

右為末服法如前

治霍亂方

巴豆

一兩
去壳

乾姜

三兩
炮

大黃

五兩

右為末煉蜜為丸如梧桐子大米飲服三丸以利為度不利粥湯投之

治脚轉筋方

拍碎水煎五合服之愈本方云生姜一斤煎二升
半服之

入戰辟五兵不傷人方

雄黃

一兩

白礬

二兩

鬼箭

柄

羖羊角

燒二分半

竈中土

三分

右為末以雞子黃并雞冠血為丸如杏子大置一丸
於小囊中繫腰間及膊上勿令離身亦辟一切毒

療馬齒毒方

灰汁數斗暖者洗瘡處愈又以馬糞者亦可

療馬膿垢附人作瘡方

馬鞭梢二寸燒灰飛鼠七枚各燒灰敷之

療金瘡傷因發者及傷裂突出腸方

黃芪 當歸 芎藭 白芷 續斷 黃苓

細辛 乾姜 附子 芍藥

各三兩

右件為末先飲酒醉次服五錢匕日三服又云服半

錢七日三服加至方寸匕驗

療金及中骨脉中不出

白飲

半夏

各二兩

右為末酒調服方寸匕日三服至二十日自出立愈
療金瘡傷中破驚方

火烧葱取汁塗之立愈亦用女人中衣舊者以襠
灸熨之為愈

療馬墜損有瘀血在腹内方

生地黄五升爛研以酒搗汁一盞日服三服至服
愈又方地黄二升搗令乾以無灰酒半斗煮三二
沸重戶地暖飲之令醖

療馬墜折手脚骨痛方

右搗大麻根并葉取汁服之氣下乃蘇若無大麻子
根葉研子温酒調下亦得

治馬藥方篇第八十一

經曰馬有四百八病蓋在將調冷熱之宜常加消息

春夏常灌馬方

鬱金

芎藭

當歸

大黃

升麻

黃連

細辛

今方不用當歸芎藭細辛却入黃柏吳藍青黛梔子
秋冬加官桂乾姜右為末每灌七錢蜜油各一合湯
半斤攪勻灌之其冷氣則加乾姜官桂各一兩今多
以煮糯米粥半升油五合猪脂四兩蜜三两早飲了
啖之候日色溫來日復啖之

馬熱不食水草方

芒硝 礬金

右每灌七錢入酥半兩水一升攪勻灌之云刺帶脉
取出血

治馬漏蹄方

先以刀削令隱便次以髮灰羊脂填了以黃蠟固之
療馬內黃不食水草顫喘臥數起口張喘急頭微垂利
方

青黛

三兩

大黃

二兩

白鹽

五合

右為末每灌三七油蜜各一合温水一升灌之馬有
黑汗出臥不起汗流如珠顫喘氣急嘗汁啖即死酖
即不死取人汗鞮燒湯按濃汁灌三升瘥又方刀子
割馬尾小頭作十字使出血以人糞塗之良或燒人
糞以亂髮敷之差

療馬轉胞不大小便方

以人糞并大蒜橘湯成膏納尿孔中則立尿又纏馬

腸放後蹄間挽之令跳自止

療馬結草方

以熱手捻令結消不消以火灸掃帚柄築之

療馬蟲顛方

桑根皮

大棗肉

葶藶子

各一兩贊令黃色另研作膏

右和勻水三升灌之一時辰令頭低滴鼻中惡物愈
次以大黃油雞子清灌之又云桑白皮一握舊乾煮
棗五十枚煮取穰葶藶子六兩贊令黃右以水六升

桑根大棗味取汁一大升去渣內葶蘆子膏攪勻相
得更煎取強半停令冷暖得所分為兩度灌所患之
鼻如人行八九里一灌乾地著草繫頭底即出鼻中
惡物令甚走又以大黃油雞子灌之

太白陰經卷七

欽定四庫全書

太白陰經卷八

唐 李筌 撰

雜占總叙第八十一

經曰天文者懸六合之休咎兵書者著六軍之成敗今
約一戰之事編為篇目其餘災變昧而不書夫天道遠
而人道通人道謀而陰故曰神成於陽故曰明人有神
明謂之聖人夫聖人者與天地合其德日月合其明與

四時合其序與鬼神合其吉凶故曰先天而天弗違後
天而奉天時天且弗違而況於人乎況於鬼神乎人若
謀成策勝則天地日月鬼神皆合之人若謀缺策敗則
雖使大撓步歷黃帝拔元甘德占星巫咸望氣務成災
變風后孤虛欲幸之勝未之有也蓋天道助順所以存
而不亡若將賢士銳誅暴救弱以義征不義以有道伐
無道以直取曲以智攻愚何患乎天文哉可博而解不
可執而拘也

占日篇第八十二

經曰日者實也光明盛實布照四方神靈御之葵霍向
之太陽之精積而成象光明內發休鬼內含故人君法
之吉凶禍變必照臨下土日珥者拜大將軍有軍在野
珥南則南勝珥北則北勝東西准此兩軍相對將欲解
和 日暈而珥外軍凶 日抱暈隨抱軍勝 日有白
足破軍殺將 日有背氣色青赤曲向外為背叛之象
其外有臣叛將軍守邊有二心 日有玦氣似背有枝

直向外如山字兩軍相當所臨者敗 日有暈氣傍日
周圍中赤內青營軍之象對敵之上色濃厚者隨方軍
勝 日月皆暈兵陣不合七日暈不解不可起兵暈而
珥外兵凶 日抱暈而珥者易上將 日暈而玦者兩
軍相當隨玦兵敗 日暈而直氣在傍所臨軍勝 日
暈而背虹珥反直而貫之者順虹擊之大勝 兩軍相
當日有冠纓者和解抱戴者大喜 日暈而有兩珥在
內外者并有雲聚不出三日下有圍城

占月氣色篇第八十三

經曰月者缺也盈極必缺太陰之精積而成象光以照
夜女生之義此德刑罰吉凶休咎以警戒于下土 月
有暈先起兵者勝 月暈抱戴有赤色在外外人勝在
內內人勝 月暈抱戴赤色明客勝 月暈歲星赤色
客勝 火入月中色惡客敗色明客勝 月暈鎮星色
不明主勝色明客勝 月暈太白色不明主勝色明客
勝 月昏星辰不明主勝色明客勝 月暈亢先起兵

有喜且勝軍出月蝕凶 月昏房糠大風起 月暈參
伐兵起有軍不勝

有占五星篇第八十四

經曰五星者昊天上帝之使也稟受帝命各司其職雖
幽潛深遠罔不悉及之故福德祐助禍淫威刑或順軌
而守常或錯亂而表異光芒角變色動衰盛居留干犯
勾衝掩密所以告示下土凡五星各有常色本體吉歲
星青熒惑赤

如參左
角狀

鎮星黃太白白

如五車
大星

辰星黑凡

五星青為飢憂赤圍為旱交爭黃熟女主吉白兵喪黑
水疾五星黃角有兵交爭赤角犯我城白角有邊兵青
角憂愁生黑角死喪行五星色變常者青憂白兵赤旱
黑喪黃熟

歲星木星占

木乘金偏將軍死木金合鬪將死木守七星天下起兵
木乘昴國有憂番主死木入畢中邊起兵木犯畢附耳
起兵木守參代有兵木犯井兵起木經柳有兵木守軫

罷兵木入天將軍興軍吉木入五車兵起木守羽林兵起木星犯參旗大將軍出征凶

熒惑火星占

火用宜背火在鶉火之次宜背午地他皆做此火犯木土主大戰不勝亡偏將軍熒惑環太白偏將軍死火與太白相連而闖破軍殺將火入太白中上出破軍殺將客勝火所不利先火起犯左右角有兵火守亢有兵火入亢有兵水災火入房馬貴出房馬賤火入糠兵起火

犯南斗破軍殺將吳主死中國飢火入牛破軍殺將
越主死火入須女入危兵起火犯東壁伏兵起火守
昴邊人不安入昴匈奴破期三年火犯畢左角大戰右
角小戰五星犯畢邊兵起火犯附耳兵起火犯觜趙地
兵起火犯參有兵火入東井一星將軍野戰死火犯輿
鬼兵起火守七星外有兵起火乘張有兵火與張合兵
起有殃火守張大將軍驚火犯翼邊兵起火入軫有兵
火行南河界有邊兵火犯太微上將上將亡次相次相

亡火犯角大臣亂而有憂入亢有白衣會主將死人多
疾疫入氐主兵起失國赦天下惡吉火犯心戰不勝大
將死絕嗣大臣亂主出營有哭泣入尾臣下妖淫年多
妖祥大亂入箕穀大貴妃后惡之燕王死入虛齊王死
相走出兵罷犯畢人疫臣反主崩大水兵起入壁魏王
死天下兵留壁二十日土工米貴女主惡之犯奎魯王
凶大水大疫大臣謀主犯婁有暴兵有死主大飢盜賊
起犯胃趙大有兵主大勝犯鬼執法有誅天下大疫有

女喪大赦吉犯柳有木工犯星大臣亂易服色

鎮星土星占

土犯星左角大將戰死水災土守右角兵路不通土守
亢有兵臣下反土守糠大兵起土入天廟有兵起土守
虛出入有客兵至不過五日自去入奎兵起土入婁邊
兵起天下凶土入胃客軍敗主軍用土入昴番王死番
人為亂土入觜兵起土逆行守參有番兵土守牛越兵
起土出入胃舍七星兵起於大海濱土守張多盜賊兵起

興土工土入軫兵發而自敗入天庫有兵土守南河蠻
夷起兵邊界有憂土出東掖門為將守事東出德事出
西掖門為將守事西出刑事犯氏星皇后憂宮人死天
下大疫犯房天下相代皇妃亡邊兵反犯心天子絕嗣
將相死放大赦修德吉犯尾天下不安后妃惡之犯箕
大亂女主憂民流亡大兵起犯斗其國失地先後旱大
臣逆亂犯牛有奸賊牛馬棄于道天下急宜赦犯女更
往令天子喜有女喪犯虛有刑令大憂有客兵鈇鈇用

入危天下亂國亡將死人哭泣入室關梁不通貴人死
女子恣橫犯壁遠方入貢國大水天下立王犯畢令不
行將相亡入背相死兵大起侵死有反者犯參多水旱
邊兵起入井水旱大臣死犯鬼多戮死秦地有反

太白金星占

太白一名長庚西方金德白虎之精招搖之使其性義
斷其事言詞其時秋其日庚辛其辰申酉其帝少皞其
神主蓐收太白主兵馬為大將軍為威勢為斷割為殺

伐故用占之是以重述其德異於常星也金體大而色
白光明而澤潤所在之地兵強國昌兵出則出兵入則
入順之吉逆之凶出高深入吉淺入凶先起勝出下淺
入吉深入凶後起勝金晝見有軍軍罷無軍軍起金出
東方始出為德月未盡三日在月南德行在月北失行
是謂反生不有破軍必有屠城北國當之金出東方月
未盡三日月在北圓海之國不勝在月南中邦不勝在
月北敗謂失行金入火必敗兵金西方為德月三日金

在月北員海之國戰勝在月南員海之國敗金與月相
夾有兵拔城偏將大戰金與月共出守者屠城金與列
宿相犯小戰金與五星相犯大戰金在南南軍勝在北
北軍勝金出東方舉事用兵順之吉逆之凶西南北皆
倣此金守南斗三十日夷狄來侵金入羽林兵起金蝕
畢昴番王死金光暗戰不勝將軍死金變色戰勝隨方
色青東方他皆倣此金八月客軍大敗野有死將金白
而角文可戰色赤而角武不可與戰金與木合無怒必

戰金應出而不出應入而不入此謂失舍不有破軍必有死將所受之邦不可與戰未當出而出未當入而入必有破軍于野金受十日後將軍死金初大後小兵弱初小後大兵強金有角有兵敢戰吉不戰凶順角指處擊之吉逆凶金行遲兵遲行金行疾兵疾行金大行用兵疾吉遲凶金入則兵入出則兵出兵行法此金木一東一西害侯王一南一北兵乃伏金犯畢左角左將死金八月客將死金出而水没金水俱出東方東軍勝西方

西軍勝水居金前軍罷水居金北小戰金南大戰金進則兵進金退則兵退金出未高而敵深者勿與戰去而勿追金赤角兵戰白角則軍起黑角軍罷青角軍憂白角又主國喪軍亡隨角所指處應金晝見是謂經天金犯五星大有兵起犯火大戰在南南勝他皆倣此金犯角大戰不勝將軍死金陵房赤色有兵戰金干亢大將不勝將軍鬪死金入留守尾兵起於野將士滿道金入南斗將軍死金犯南斗破軍殺將金犯牽牛將軍失其

衆守牛兵起金入危犯守有兵起金入營室暴兵滿野
將軍死金守犯東壁大兵起金入奎兵起外兵來入國
金犯守婁將軍功金守胃兵起金守昂番王死四夷憂
金犯畢邊兵起金犯左角邊兵大戰金入畢馬貴兵有
傷金犯觜兵起宜用斧鉞金犯守參主邊兵起左右肩
大將憂金犯參伐兵起金守犯東井將軍惡之金入東
井大兵起金入柳大兵起益地金犯輿鬼大兵起金入
翼大將死天下兵起金犯七星將軍出塞金犯軫其國

出軍得地

辰星水星占

水土合為覆軍水出東方大而白有兵在外解金水俱
出東方員海國勝水入月主人敗兵亡地水金合旗出
破軍殺將客勝視其所指以命破軍水環遶太白興兵
大戰客勝主人敗水遇金其間可容劍小戰則客勝水
出太白左小戰磨太白又去三尺軍戰水在金北利主
人在金南利客水房守北軍敗水守婁北兵起水干昂

夷狄兵起水守心大臣相殺大水異姓立王犯尾大水
犯箕有赦若守左角動色貴臣戮死犯斗大臣誅一曰
兵守赤色天下敗兵犯斗五穀不成守水湧犯女有婚
娶事萬物不成犯虛天下亂多水犯危大水有後喪臣
謀君主犯室有兵大水犯壁刑法苛朝廷憂犯奎有火
為害水乘昂出其北番王死中國大水水入畢有兵出
北北主憂出南南憂犯觜發兵水守參伐星移南南蠻
下移北北番侵水入東井星進兵進星退兵退水干犯

輿鬼兵起水入庫兵起水入柳牛馬貴犯星臣亂水守
張兵起大水水入翼中刑及賢相大凶犯軫大兵起喪
物不成犯角大水舟船相望犯亢大水干犯五車兵起
水留心南河兵起西方

占流星篇第八十五

經曰夫流星者天之使也自上而降下曰流自下而升
上曰飛大者曰奔小者曰流星大則使大星小則使小
星者謂紫微宮太微宮出入而徐行漸經次於列宿之

次也或於列星之坐為使也聲大怒之象行疾則其疾
行遲則其遲非二宮出者並為妖星流星赤色有角者
四夷前赤後黑兵敗將亡流星入參不出先起者勝後
起者敗流星干七星者兵起流星入建星者色青兵起
流星入河鼓者大將軍亡出河鼓兵出入河鼓兵入流
星入王良馬盡驚流星入天將軍軍驚流星入將入星
出將出流星入紫微宮匈奴兵起流星入三台大將出
流星入騎官騎官死流星入羽林兵大起流星抵北落

兵大起流星出天宮匈奴兵起流星抵天市垣大將出
流星抵天狗犯弧矢將有千里之行使星出天廡兵馬
出

占客星篇第八十六

經曰客星者非本位之星故曰客星也色白如氣勃勃
然似粉絮故所過之宿分野必有災害客星出營室無
兵則兵起有兵則兵敗客星入奎破軍殺將客星犯婁
邊人亂客星入昴邊人犯塞客星入畢邊有急兵客星

干甯城堡虛兵儲少軍民餓死客星守張將軍有陰謀
兵起客星入招搖邊軍大起客星入天槍中兵起客星
入天棓兵起客星犯文昌將星色蒼將有憂色多赤將
驚色黃將有喜色黑將死客星守傅舍邊人入中國客
星守天難天下兵馬盡驚客星守天街番王死客星入
庫婁與守南門與守軍士守老人皆主兵起客星守騎
官將憂士卒散客星守北落師門虜人入塞兵起客星
入天倉粟大貴天客入天廡兵起馬死客星入天弓天

下弓弩皆張客星出天弓匈奴兵起客星守狼夷狄來
降客星守弧南夷降客星守車騎西羌來降客星守九
州珠口員海國不安客星入天節番王死

占妖星篇第八十七

經曰妖星者五星之餘氣結而為妖殊形異狀凶多吉
少所見之分必有災害奔星所墜之下有大兵起流星
前赤後黑客軍敗散流星從敵營上來我軍上銳者有
間謀來說吾兵流星尾長三四尺輝輝然軍使也色赤

者將軍使也流星色青赤有光尾長三四尺者名曰天
鴈將軍之精華也兵從星所擊者勝流星色蒼白為使
赤有兵黑將死飛星如大甕後大曉然白前卑後高所
謂頓頑大將死邑削飛星後化雲者名曰大滑流血積
骨之象枉矢類流星色青蛇形如矢而枉道所指將軍
死天狗如奔星有聲墜如火光炎炎燭天其下有積屍
流血狗來食之

占雲氣篇第八十八

猛將氣 勝軍氣 敗軍氣 城壘氣 伏兵氣
暴兵氣 戰陣氣 陰謀氣 四夷氣 遠近氣
經曰天地相感陰陽相薄謂之氣久積而成雲皆物形
於下而氣應於上是以荆軻入秦白虹貫日高祖在沛
彤雲自覆積蜃之氣而成宮闕精之積必形雲之氣故
曰占氣而知事望雲而知其人也

占猛將氣

猛將之氣如龍如虎在殺氣中猛將欲行先發此氣如

無將行當有暴兵起吉凶以日神占之猛將之氣如煙
如粉沸如火光夜照人猛將之處有赤白氣相遠猛將
之氣如山林如竹木色如紫蓋如門樓上黑下赤如旌
旗如張弩如塵埃頭尖本大而高兩軍相當敵軍器上
氣如困倉正白見日愈明此皆猛將之氣不可擊也敵
人營上氣黃白潤澤將有威德不可擊也氣青白如膏
將勇大戰前白如卑後青如高將怯士勇前大後尖小
將怯不明敵上氣黑中赤氣在前者將精悍不可當敵

上青氣而踈散者將怯然軍上氣發漸漸如雲裏山形將有陰謀不可擊若在吾軍之上速戰大勝敵上氣如蛟蛇向人此猛將之氣不可當若在吾軍之上速戰大勝

占勝軍氣

氣如火光如山隄如塵埃粉沸如黃白旌旗無風而飄揮揮指敵此勝軍之氣所在勝軍不可擊雲氣如三足帛前橫後大氣如樓緣似赤氣者所在兵銳不可擊軍

上有氣如人持斧如蛇舉首而向敵者皆勝氣如足帛者此助勝之氣所在不可擊軍上氣如覆舟如牽牛如鬪雞所在不可擊軍人有五色氣連天不可擊軍上有雲氣如華蓋如飛鳥如伏虎所在不可擊攻軍上氣如五馬頭低尾仰如杵如赤馬在黑氣中如黑人在赤氣中如杵在黑雲中如人十十五五旌旗在黑氣中有赤色在前者皆精悍亦不可擊

占敗軍氣

敗軍之氣如馬肝如死灰如偃蓋如臥魚乍見乍隱如霧之朦朧衰氣也若居敵上宜急擊之雲氣如壞山從軍營而墜軍必敗氣昏發連夜照人則軍士散亂軍上有氣一斷一續軍必敗軍上黑氣雲如牛狀如豬脂如羣羊名曰瓦解之氣軍必敗軍上有雲氣如雙蛇擊之勿疑軍上氣如塵灰如粉煙雲霧勃勃撩亂者軍敗軍上有五色雜氣東西南北不定或如羣鳥亂飛如紛紛如轉蓬或如敗船或如臥人無手足或如

覆車散亂不起者皆敗軍之氣擊之必克 軍上氣上
大下小者士卒日減 軍上氣十日無氣發者其軍必
敗十日無氣忽有赤白氣乍出即滅者外聲欲戰實欲
退散 軍上氣出而半絕者欲敗漸盡者走一絕一敗
再絕再敗三絕三敗在東發白氣災深赤氣如火光從
天而下入軍軍亂將死 軍上氣蒼蒼須臾散或前高
後卑或黑氣如牛馬形從氣霧中漸漸入軍名曰天狗
食血其軍散敗 兩軍相當十里之內三里之外望彼

軍上氣高而後前白青散者敗氣也 雲氣如人頭雞
兔臨軍上雲蓋道蔽濛晝晦者宜急走不然必敗 軍
上氣先青而變黑者其將必死 散軍之氣如燔生草
之烟前雖銳而後必退 軍上氣如丹蛇者如尾在氣
霧中臨軍上者中人與外人通 軍行有白氣如猪來
臨者大驚宜備 日暈有氣如死蛇屬暈者不利先舉
日暈旁有赤雲如懸鐘其下死將 日月暈有背所
臨者敗 白虹及蜺入營者敗 日暈有四玦在外軍

悉敗散 日暈薄及後至先去其下敗軍 降氣如人
十五五皆低頭叉手相向或氣如黑山以黃為綠者
白氣如鳥趨入屯營連絡不絕須臾下者當有來降

城壘氣

正白如旌旗或白氣如旗而赤界其邊或氣出於外如
火煙或有雲分為兩截狀如城壘皆堅而不可攻 白
氣如城中南北出者城上黑雲如星名曰軍精宜急解
去 赤雲或黃雲臨城城中喜青雲從軍城南北出者

不可攻 城上有雲青色如牛頭觸人外向者城中有
氣出東其光黃大一城也 白氣中出青氣入北反覆
回還不可攻 凡攻城圍邑過旬不雷不雨者為城輔
勿攻城壘氣出于外如烟火者或如雙蛇舉首向敵或
赤氣如杵形從城中出向外內兵突出客敗 凡攻城
有諸氣從城中出兵不得入濛氣繞城而不入城外兵
不得入日暈有青氣從中起四出者圍中勝 凡攻城
有黑氣臨城者積土固險之象黑者水之氣城池之象

也我據城敵不可攻敵據城我不可攻凡圍城平旦視
圍上氣鬱鬱如火光芒勢翕翕然者其方救至無者救
不至受圍者望外救亦以是占

伏兵氣

氣如赤杵幢節在烏雲中或如烏人在赤氣中或黑氣
渾渾圓而赤氣在其中或白氣粉沸起如樓狀其下皆
有伏兵 若軍行近山谷之間林坑甚防之 雲紛紛
綿綿相絞及似蒿草長數尺者以車騎為伏兵如布席

似蒿草長尺者者步卒為伏兵 黑雲出營南賊逃我
後有伏兵謹候察之 兩軍相當赤氣伏兵氣若前有
赤氣則前有伏兵後有赤氣後有伏兵左右亦如之
黑雲變赤反白形如山者有伏兵雲如山林或前有黑
氣後有白氣者有伏兵

暴兵氣

氣白如瓜蔓連結部隊相逐須臾罷而復起或如八九
而來不斷者有急賊至 白氣如仙人衣千萬連結部

隊相逐罷而復興當有千里兵來 黑氣從彼來我軍者欲襲我也敵人急宜備不宜戰敵還從而擊之必得小勝天色蒼茫而有此氣依支干數內無風雨所發之方當有暴兵日克時則凶時克日則自消散此氣所發之方當有事告急一人來則氣一條依數計之若散漫一方則有衆來依日支干數內有風雨則伏兵氣如人持刀盾或有雲如坐人赤色所臨城邑有猝兵至赤氣如人持節雲如方虹或如赤虹其下暴兵或如旌旗如

虎躍如人行或白氣如道帶竟天或白虹所出或赤雲
如火或雲如足布著天經丑未者天下多兵赤者尤甚
有雲如番人列陣或白氣廣五六丈東西竟天有雲如
豹五六枚相聚或如狗四五枚聚四方清明獨有赤雲
赫然者所見之地兵起 四望無雲獨有黑雲極天名
曰天溝兵起 壬子日俟四方無雲獨有雲如旌旗其
下兵起徧四方天下兵起 雲氣一道上白下黃白色
如布足長數丈或上黃下白如旗狀長三二丈或長氣

純赤而委曲一道如帛布皆謂之蚩尤旗見兵大起

戰陣氣

氣如人無頭如死人如丹蛇赤氣隨之必有大戰殺將
四里無雲獨有赤雲如狗入營所下有流血或獨見
赤雲如立蛇或赤雲覆船其下大戰 白虹或赤虹屈
見城營上其下大戰流血 白氣如車入北斗中轉移
者大戰雲如耕隴大戰 日旁白氣如虹或白氣如虹
交見兩軍相當必交戰無軍兵起 四五六虹見大戰

日月有赤雲截之如大杵軍在外萬人戰死兩軍相
當其下不利先舉 日暈有一缺萬人死其下兩軍不
利先舉 月初滿而蝕有軍必戰 蒼白雲氣經天其
下有拔城大戰 赤氣漫漫如血色有大戰流血

陰謀氣

氣白而羣行徘徊結陳來者他國人來相圖謀也不可
應視其所往隨而伐之可得黑氣如幢出于營中上黑
下黃敵欲來求戰而無誠實言信相反九日內必覺備

之吉 黑氣臨我軍如車輪行敵人謀亂國有小臣勾
引宜察之 黑氣如引索來如陣前銳者有陰謀 天
沉陰不雨晝不見日夜不見星月三日已上者陰謀也
將軍宜慎防左右 連陰十日亂風四起欲雨不雨其
曰濛為臣謀君 天陰沉日月無光有雲障之不雨為
此君臣俱有陰謀兩敵相當則陰謀起若晝陰夜晴君
謀臣夜陰晝晴臣謀君 日月濛濛無光士卒謀亂內
將軍宜循法度察有功以自明止嚴刑而伺奸人謀議

也

四夷氣

海旁蜃氣象樓臺 廣野氣成宮闕 自華以南風上
黑下赤 嵩高山河氣正赤 恒山之北氣清 渤海
之間氣正黑 江淮之氣皆白 東海氣如篔簹 河
水氣如引布 江漢氣勁如杼 濟水氣如黑狔 渭
水氣如狼白尾 淮南氣如白羊 少室氣如白兔青
尾 恒山氣如黑牛青尾 東夷氣如樹 西夷氣如

室屋 南夷氣如閣臺或如舟船幡旗 北夷氣如羣
羊如穹廬 韓雲如布 周雲如車輪 秦人如行人
衛雲如犬 齊雲如絳衣 越雲如龍 蜀雲如困
宋雲如車 魏雲如鼠 吳雲如日 當其地而見者
不占

遠近氣

凡候氣之法氣初出時若雲非雲若霧非霧彷彿若可
見初出森森然若在桑榆之上高五六尺者是千五百

里外氣也平視則千里舉目望則五百里仰望中天即百
里內平望桑榆間二千里登高下屬地者三千里

凡候敵上氣敵在東日出候之在南日中候之在西日
入候之在北夜半候之欲知我軍常以甲巳日及庚
子戊午日未日亥日及八月十八日去軍十里登高望
之但百人以上則皆有氣凡氣欲似甑出炊氣勃勃而
上升外積結成形而後可占氣不積結散漫不定不能
為災祥必須和雜殺氣森森然乃可論也凡軍城上氣

安則人安氣不安則人不安氣盛則衆盛氣衰則衆衰
氣散則衆散

凡氣得旺相色吉休囚死色凶


軍上氣高勝下厚勝薄實勝虛長勝短澤勝枯

凡占災祥先推九宮分野六壬月日不應陰霧風雨其
下乃準

凡氣候氣常以平旦下晡日出沒之時蓋氣多假月光
耀照之而形故暈珥抱背昏出日月之旁虹蜺相象莫

不因實而見是故晝候日旁夜候月旁輝光所燭無得而隱矣凡氣見近三日遠七日內有大風雨則災不成故曰風以散之雨以解之

凡軍行先觀其氣兵有勝負氣有盛衰氣銳兵強氣伏兵弱兵行氣行兵往氣往兵急氣急兵散氣沒故曰氣是兵主風是兵苗為將者不可不知也



太白陰經卷八